

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

**DARIPADA : DATO' MANSOR BIN OTHMAN
[NIBONG TEBAL]**

TARIKH : 22.3.2018 (KHAMIS)

**Dato' Mansor Bin Othman [Nibong Tebal] minta MENTERI
PERDAGANGAN DALAM NEGERI, KOPERASI DAN
KEPENGUNAAN menyatakan Sistem Pemantauan Harga, jika ada dan
bagaimana kaedah pelaksanaan sistem ini.**

JAWAPAN:

Tuan Yang Di-Pertua,

Untuk makluman Dewan yang mulia ini, Kerajaan telah melaksanakan Program Pemantauan Harga sejak tahun 2008 melalui khidmat **1,045 orang Pegawai Pemantau Harga** yang dilantik secara kontrak. Melalui Program ini, data harga bagi 5,000 barangan keperluan pengguna terpilih dikutip secara fizikal di **20,319** premis-premis perniagaan di seluruh negara. Kutipan harga ini dilaksanakan secara konsisten mengikut jadual harian, mingguan dan bulanan. Selain daripada kutipan data harga secara fizikal, Kementerian juga memperolehi data harga bagi 10,000 item melalui *submission by notification* oleh hypermarket setiap bulanan.

Data harga ini akan disimpan di dalam sistem databank. Seterusnya data harga ini akan dianalisa menggunakan *Business Intelligent Tools* dan perisian-perisian lain bagi tujuan penyelidikan. Antara analisa yang dijalankan adalah *trend* atau aliran perubahan data harga barangan bagi tempoh-tempoh tertentu; taburan harga di lokasi-lokasi berlainan; dan korelasi data harga faktor pasaran semasa yang berkaitan dengan perubahan harga seperti pengenaan cukai, perubahan harga bahan bakar, perubahan musim, perubahan kadar tukaran mata wang asing dan sebagainya. Analisa-analisa ini adalah untuk membantu Kerajaan merangka dasar berkaitan harga barangan.

Data harga ini juga digunakan di dalam sistem *Price Alert* iaitu sistem yang mengesan perubahan harga. Sekiranya *Price Alert* ini mengesan perubahan harga yang mendadak, siasatan di bawah Akta Kawalan Harga dan Antipencatutan 2011 akan dijalankan oleh

Penguatkuasa KPDNKK untuk mengesan sama ada terdapat kegiatan pencatutan.

Maklumat data harga barangan ini turut dipaparkan kepada Pengguna melalui Portal 1Pengguna.com dan aplikasi mudah alih *Price Catcher*. Aplikasi ini dibangunkan untuk memudahkan pengguna menyemak dan membandingkan harga barangan di premis-premis berhampiran. Melalui perbandingan ini, pengguna boleh membuat pilihan premis yang memberikan harga terbaik dan berpatutan dan seterusnya merancang perbelanjaan mengikut kemampuan.